

# Ussa refurmas e progress era tar il parlament sez

La Partida socialdemocratica ha inoltrà ina iniziativa dal pievel

DA MARTIN CABALZAR

■ L'iniziativa dal pievel inoltrada da la Partida socialdemocratica ier a Cuira vul reducir il dumber da las deputadas e dals deputads en il cussegl grond d'actualmain 120 sin 90. Munida cun 4384 suttascripziuns è ella vegnida surdada ier a Cuira a la chanzlia chantunala. Tenor la deputada *Erica Cahenzli* (Vaz-sut) è il Grischun sa midàa considerablamain ils ultims onns ed il chantun ha er obtegnì novas structuraras. Praticamain tut ils stgalims statals èn vegnids refurmads. Il dumber da vischnancas è sa reduci da passa 200 sin rund 110.

Cun la refurma dal territori èn ils districts, las corporaziuns regiunalas ed ils circuls vegnids remplazzads dad 11 regiuns e la nova gulivaziun da finanzas ha eliminà fauss stimulsi finanzials e l'introducziun dal principi da publicitad ha procurà per dapli trasparenza en l'administraziun. Il chantun è pia daventà modern, cun ina suletta excepziun: il cussegl grond, di Cahenzli. El sez n'è betg stà abel e pront da realisar refurmas vi dad el sez.

## En buna cumpagnia

Tenor Cahenzli èn ils parlaments da differents auters chantuns vegnids reducids numericamain ils ultims onns: Berna, Argovia, S. Gagl, Schaffusa, Solothurn, Basilea-citad, Glaruna, Friburg, Lucerna, Vad e da nov era Neuchâtel han reduci il dumber da lur parlaments chantunals. La legislativa dal Grischun, il cussegl grond, dumbra dentant vinavant 120 chaus.

Quai è tuttina blers sco en noss chantun vischin S. Gagl. Lez dumbra dentant il dubel dumber d'abitants ch'il Grischun. Vesì objectivamain fissan 90 de-



L'iniziativa da la ps vuless reducir il dumber da deputadas e deputads dal cussegl grond.

FOTO O. ITEM

putadas e deputads tuttina anc proporziunalmain dapli che a S. Gagl.

## In na drova betg dapli

Tenor la Partida socialdemocratica tanschan 90 deputadas e deputads per ademplir la lavur parlamentara en il Grischun. Pertge i dat sulettamain 88 posts en las cumissiuns permanentas. Là succeda l'effectiva lavur parlamentara. 32 deputadas e deputads n'han oz nagina sutga en las cumissiuns ed uschia nagina incumbensa permanenta en il parlament. «Da quai resulta in parlament da duas classas e quai è simplamain inefficient», punctuescha Cahenzli. Tras ina reducziun sin 90 commembers pudessian questas resursas vegnir nizzegiadas meglier. Al pievel stess uschia a disposiziun in parlament professiunal, cumpetitiv e manivel al pievel, argumentescha

Cahenzli. Tenor Cahenzli n'èsi betg da smirvegliar ch'il parlament sez ha refusa questa moziun. Pertge in dals sez per tutgads da las reducziuns pudess era esser l'agen. Perquai èsi necessari ch'il pievel po decider, damai ch'il cussegl sez è pli u main pregiuditgà e partischant en quella dumonda che concerna els sez. Per quel motiv ha la ps rimnà suttascripziuns e quai l'atun passà e puspè dapi questa stad. «Il progress na dastga betg franar avant il cussegl grond», punctuescha Cahenzli. Cun l'iniziativa «90 èn avunda» vegnian ins in pass enavant en la finamira da refurmar il cussegl grond.

Cun l'iniziativa «90 èn avunda» vegnian ins in bun pass enavant sin la via stentusa d'ina refurma dal cussegl grond. Il comité d'iniziativa ha contribuì a la pussaivladad dal suveran da s'exprimer en questa impurtanta dumonda.

## Per dapli democrazia

Tenor il parsura da la Partida socialdemocratica dal Grischun, deputà *Philipp Wilhelm*, porta l'iniziativa «dapli democrazia». Pertge ella pretenda che la proporziun tranter il dumber d'abitants e las sutgas ch'èn d'occupar duaja esser sumeglianta en tut ils circuls electorals. Uschia stessan davos scadina deputada e scadin deputà pressapoc tuttina bleras burgaisas e burgais. «Quai è in cumond da la constituziun», punctuescha Wilhelm. Dentant betg mo quai. El haja er in'influenza positiva sin la cumposiziun dal cussegl grond. Sch' il parlament vegnia reduci, l'equivalenza da las vuschs dentant mantegnida maina quai a circuls electorals pli gronds, uschia che l'elecziun e selecziun dals candidats creschian tendenzialmain. In sguard sin las ultimas elecziuns documenteschia: en 15 da 39 circuls

lectorals n'ha il suveran gì nagina schelta d'eleger, damai ch'ins ha nominà mo gist tants candidats sco quai che posts eran d'occupar. Questa situaziun è d'attribuir cunzunt als numerus circuls cun sulet in mandat nua che candidaturas cunter in mandatari en uffizi n'han praticamain nagins aspects da reussir, manegia Wilhelm. Per mancanza d'ina vaira elecziun sajan politichers masculins e pli vegls il meglier represchentads en il cussegl grond. Absolutamain sutrepreschentadas sajan las dunnas e las minoritads linguisticas. Quai veglia l'iniziativa cumbatter.

## Las partidas han dapli influenza che las regiuns

La tema che las regiuns na sajan alura betg represchentadas commensuradamain cun il nov sistem, na vesa Wilhelm betg. I saja numnadamain in'illusiu da crair che las regiuns hajan oz ina pli gronda influenza sin il cumportament da votaziun dals deputads che la partida. In studi documenteschia gist il cuntrari. Quel mussia ch'ils parlamentararis chantunals votian schizunt pli fitg tenor partida ch'en il parlament federal.

Era cun 90 deputads sajan las regiuns vinavant bein represchentadas, è Wilhelm persvadì. L'iniziativa saja era formulada a moda averta. Ella pretenda sulettamain ch'il dumber da deputadas e deputads vegnia reduci sin 90. Sche l'iniziativa vegnia acceptada dal pievel fixeschia il parlament ils detagls. Co il circuls electorals vesan la finala ora e co la repartiziun regiunala succeda decida la finala danovamain il pievel, punctuescha Wilhelm. Tar la rimnada da suttascripziuns sin via saja l'inefficienza dal cussegl grond crudada sin nunchapientscha, uschia che l'iniziativa haja bunas schanzas da vegnir acceptada dal pievel, manegia il parsura da la ps concludend.